

28/08/1999

Perayaan boleh bangkitkan rasa cinta rakyat Malaysia

KUALA LUMPUR, Jumaat - Perayaan Seabad Malaysia Ke Alaf Baru yang akan dilancarkan pada 30 Ogos ini berupaya membangkitkan rasa cinta rakyat terhadap negara.

Selain itu, ia akan digunakan untuk memberitahu masyarakat dunia bahawa Malaysia sudah bersedia menjadi negara maju dan menghadapi cabaran alaf baru.

Timbalan Ketua Setiausaha Kementerian Kebudayaan, Kesenian dan Pelancongan, Datuk Tengku Alauddin Tengku Abdul Majid, berkata semua konsep persembahan yang bakal diketengahkan pada perayaan itu berlandaskan budaya masyarakat tempatan.

"Ia adalah perayaan dan sambutan Malaysia berteraskan kejayaan politik, ekonomi, sosial dan budaya sepanjang tempoh 100 tahun ini," katanya di sini hari ini.

Perayaan itu, katanya, akan disambut selama dua tahun bermula 1 September ini hingga Ogos 2001. Ia bermula dengan acara perasmian secara besar-besaran oleh Perdana Menteri, Datuk Seri Dr Mahathir Mohamad, di Stadium Bukit Jalil di sini pada 30 Ogos ini.

"Ia dilakukan serentak dengan sambutan Hari Kebangsaan dengan tema Bersatu Ke Alaf Baru, yang menjadi agenda terpenting bagi mencapai wawasan negara menuju negara maju," katanya.

Tengku Alauddin berkata, Perayaan Seabad Malaysia Ke Alaf Baru akan dianjurkan serentak di ibu negara dan semua negeri yang akan dihubungkan menerusi sidang video secara lintas langsung.

"Dr Mahathir akan memasukkan satu perutusan khas kepada generasi akan datang dalam kapsul masa yang hanya akan dibuka pada 30 Ogos 2099," katanya.

Beliau yang juga Pengerusi Malam Pelancaran perayaan itu berkata, antara matlamat utama perayaan ialah meningkatkan semangat cintakan negara sendiri kalangan rakyat berbilang kaum serta budaya.

"Program ini juga untuk menerapkan nilai dan budaya melancong di kalangan rakyat Malaysia dengan menikmati keindahan negara sendiri sekaligus dapat meningkatkan industri pelancongan tempatan," katanya.

Bagi menjayakan perayaan itu, sebanyak 19 program sudah disusun termasuk sambutan Hari Kebangsaan 1999, Bulan Bahasa dan Sastera Negara, Pesta Malaysia, Perarakan Citra Warna Malaysia, Karnival Membeli-Belah, Perlumbaan Formula One, Kejohanan Golf Piala Dunia dan Le Tour De Langkawi.

(END)